

DOMINGU III ADVENTU – TINAN A

Tema

Liturjia domingu ne'e nian fó hanoin katak Maromak nia intervensaun libertadora besik ona no halakan esperansa iha fiar-na'in sira nia fuan: "imi keta laran susar: haksolok bá, basá libertasaun atu to'o daudaun".

Primeira leitura haklaken katak Na'i to'o daudaun, atu haraik moris foun ba nia Povu, atu liberta nia no lori nia ho ksolok no festa iha rai liberdade nian.

Evanjellu deskreve, Jezús Mesias nia hahalok sira: halo matan-delek sira haree, halo ema ai-kude'ik sira la'o. Fó isin di'ak ba moras-lepra sira, ema tilun-diuk rona, mate sira moris hi'as fali, haklaken ba kiak sira katak "Reinu" justisa no dame nian to'o ona. Ne'e mak kuadru moris foun no esperansa nian ne'ebé Jezús mai atu oferese.

Segunda leitura konvida ita atu keta husik dezesperu manán ita bainhira ita hein Na'i, maibé hein Nia ho pasiénsia no laran-metin.

LEITURA I – Is 35,1-6a.10

Kapítulu sira 34-35 Livru Isaías nian baibain hanaran "apokalipse ki'ik-oan Isaías nian" (atu distinge husi "apokalipse boot Isaías nian", ne'ebé mosu iha kapítulu 24-27); sira haktuir funu ikus Jahwéh nian hasoru nasaun sira, ho modu partikulár kotra Edom no vitória Maromak nia Povu nian. Kapítulu rua ne'e liga ho kapítulu 40-55 Livru Isaías nian (nia autór mak Deutero-Isaías ne'ebé hala'o profesia iha Babilónia iha deportadu sira nia leet, iha faze finál Ezíliu nian). Kapítulu rua ne'e (Is 40-55) apresenta sira-nia "ambiente naturál" la hanesan, karik tanba sira iha atrasaun ba deskrisaun eskatolójika iha Is 28-33 no, liuliu iha kapítulu 33.

Apresenta tiha Maromak nia julgamentu (kf. Is 34,1-4) no Edom nia kastigu (kf. Is 34,5-15), autór haktuir transformasaun rai-fuik maran Síria nian, bainhira israelita sira ne'ebé fila hikas husi Ezíliu atu liu bá rai liberdade nian. Profeta nia intensaun atu konsola israelita sira iha ezíliu, ne'ebé moris iha dezánimu, frustrasaun no dezesperu, tanba libertasaun kleur liu atu to'o no sira sente Maromak haluha sira. Tema ne'e desenvolve ho profundidade iha kapítulu 40-55 Livru Isaías nian.

MENSAJEN

Ita hetan iha ne'e knananuk auténtiku ida ba "ksolok", atu halakan esperansa no fó kbit ba israelita sira ne'ebé iha ezíliu. Razaun ba ksolok ne'e mak Maromak ne'ebé mai atu halo justisa: Nia sei intervein iha istória, sei salva Judá husi dadur, sei loke lurón iha rai-fuik maran atu nia Povu bele fila ho triunfu ba Siaun.

Profeta hahú hodi interpela natureza no husu nia atu prepara an ba asaun libertadora Maromak nian ba nia Povu: rai-fuik maran no rai molik sira ne'ebé ai-horis ida la moris, hetan konvite atu hatais an ho moris nakonu (hanesan iha Líbano, foho Carmelo eh rai-tetuk Sharon nian ne'ebé buras ho ai-horis) no atu hafutar an ho ai-funan ho forma no kór oioin (vers. 1-2). Nune'e mak natureza rasik sei manifesta ninia ksolok ba intervensaun salvasaun nian husi Jahwéh; natureza ne'ebé buras mak senáriu adekuadu ba Maromak nia intervensaun, katak, lori moris foun ba Povu. Aleinde ne'e, ai-hun no ai-horis boboot no

furak mak ilas Na'i nia glória no fafurak/beleza no hatudu ba ema hotu Maromak nia kboot atu hamosu vida iha ne'ebé iha de'it mate, laran-susar, esterilidade.

Hafoin, profeta dirije liafuan ba ema sira (vers. 3-4). Lalika dezanima, lalika sai ta'uk-teen, lalika rende: Maromak mai daudaun atu so'i no liberta ninia Povu. Hamutuk ho natureza sira tenke haksolok ba moris foun, basá libertasaun to'o ona.

Rezultadu inisiativa salvadora no libertadora Maromak nian mak ema matan-delek sira haree no tilun-di'uk sira sei rona no... Ain-kude'ik sira la'ós la'o de'it maibé sei haksoit hanesan bibi-rusa; ema monok la'ós ko'alia de'it maibé sei hananu ho ksolok (vers. 5-6). Maromak nia hahalok naresin tebes, lori transformsaun no lori moris nakonu.

Povu ne'ebé la'o husi rai moris-atan nian ba rai liberdade nian, mak ézodu foun ida, iha ne'ebé sei repete Maromak nia kmanek boot sira no kmanek seluk boot liután. Povu nia fila hikak mak peregrinasaun festa nian, prosisaun solene ida, halo iha ksolok no festa. Rezultadu finál ézodu daruak nian mak hasoru malu ho Siaun, ksolok rohan-laek (vers. 10).

LEITURA – Tg 5,7-10

Leitura daruak foti husi Surat ne'ebé ema ida naran Tiago hakerek (kf. Tg 1,1), ne'ebé tradisaun liga ho Tiago Na'i nia "alin", ne'ebé prezide Kreda Jerusalém nian no Evanjellu ko'aliu liu katak nia mak ema ida naran Maria nia oan-mane (kf. Mt 13,55;27,56). Ema oho nia hodi tesi nia ulun iha Jerusalém iha tinan 62... Atribuisaun surat ne'e ba Tiago lori difikuldade ruma. Buat ne'ebé ita bele iha serteza mak autór ida-ne'e Tiago seluk, deskoñesdiu to'o ohin loron ("Tiago, Alfeu nia oan" – ne'ebé temi iha Mc 3,18 – no "Tiago, Zebedeu nia oan" – temi iha Mc 1,19 – la tama iha perfíl ne'e). Autór ne'e hakerek ho modu exelente/di'ak liu iha lia-gregu, até uza jéneru literáriu populár iha filozofia grega hanaran "diatriba". Nia foti inspirasaun husi literatura sapiensiál, atu hasai lisaun morál prátika nian. Nia mak matenek-na'in judeu-kristaun ne'ebé hanoin fila fali ho modu orijinál sabedouria judaika, no haree ninia realizasaun iha Jezús rasik niaibun no hanorin.

Surat ne'e haruka ba "tribu sanulu-resin-rua ne'ebé mrois iha Diáspora" (Tg 1,1). Espresaun ne'e refere ba sarani orijen judaika, namkari iha mundu gregu no romanu, liuliu iha rejiaun sira besik Palestina – hanesan Síria eh Ejitu; maibé, ho modu jerál, surat ne'e dirije ba sarani hotu, husu sira atu keta lakon valór sarani auténtiku sira ne'ebé simu liuhusi Kristu nia hanorin. Surat ne'e denuncia liuliu, interpretaun abuziva ruma kona-ba doutrina salvasaun liuhusi fiar ne'ebé Paulo hanorin, hodi fó importánsia ba obra sira; no ataka maka'as ema riku sira (kf. Tg 1,9-11;2,5-7;4,13-17;5,1-6).

Ita-nia testu pertense ba parte datoluk surat nain (Tg 3,14-5,20). Iha ne'ebá, autór apresenta, indikasaun konkreta atu favorese moris sarani ne'ebé auténtika liután.

MENSAJEN

Depoizde denúnsia forte hasoru ema riku sira ne'ebé hanehan ema kiak sira no hariku an hodi kaer metin sira-nia traballadór nia saláriu (kf. Tg 5,1-6), autór dirije nia liafuan ba ma kiak sira no konvida sira atu hein ho pasiénsia Na'i ne'ebé mai (hanesan to'os-na'in, bainhira hotu ona nia serbisu, ho pasiénisa, maibé nakonu ho esperansa, hein atu rai prodús ninia fuan sira). Kuadru tomak nia perspetiva mak Na'i nia vinda/mai.

Kestaun mak ne'e: emak kiak sira moris iha situaun esplorasun no injusisa ne'ebé labele tan ona tolera; maibé sira labele rezolve sira-nia problema hodi hato'o keixa no violénsia: sira tenke konfia iha Maromak no hein intervensaun ne'ebé salva no liberta sira. Pasiénsia no hein ho laran-metin Na'i mak atitude loos, iha tempu sira ne'ebé hein intervensaun finál Maromak nian iha istória.

Apelu ne'e la'ós apelu ida ba pasividade, atu la halo buat ida, atu la kontinua luta. La'ós ida-ne'e mak Tiago nia perspetiva; apelu ne'ebé Tiago husik mak apelu atu konfia iha Na'i no keta tama iha eskema injustu no violentu hanehan-na'in/opresór sira-nian... Autór hakarak atu sarani sira ne'ebé terus, moris iha esperansa: libertasaun atu to'o daudaun.

EVANJELLU – Mt 11,2-11

Molok sesaun ne'e (kf. Mt 4,17-11,1), Mateus apresenta ho forma sistemátika anúnsiu “Reinu” nian, ne'ebé manifesta iha Jezús nia liafuan no jestu sira, no eskolante sira habelar... Agora, hahú sesaun seluk, iha ne'ebé evanjelista nia interese hotu mak hatudu atitude sira ne'ebé ema eh grupu oioin sei asume iha Jezús nia oin (kf. Mt 11,2-12,50). Narrasaun hahú fali ho pergunta husi João Batista (ne'ebé Erodos Antipas hatama iha dadur laran – kf Mt 14, 1-5) nia manu-ain sira: Jezús mak loos duni “ida-ne'ebé atu mai”?

João hein Mesias ne'ebé lori ahi iha rai, kastiga ema aat no maksalak sira, hahú “Maromak nia tesi-lia” (kf. Mt 3,11-12); no, iha kontráriu, Jezús hakbesik An ba sala-na'in sira, sira ne'ebé hadook an, sira ne'ebé foer, lolo liman ba sira, hatudu ba sira Maromak nia domin, ofere se salvasaun ba sira (kf. Mt 8-9). João no ninia eskolante sai dezorientadu: loos duni, Jezús mak Mesias eh tenke hein seluk ne'ebé mai atu ho forma desidida liután, ho lójika liután no ho jusitsa liután?

Mateus iha interese espesiál ba figura João Batista nian. Ba nia, João mak loke dalan/prekursór, ne'ebé mai atu prepara ema sira atu simu Jezús. Hodi halo apresentasaun ne'e, evanjelista hakarak dirije ba João nia eskolante sira ne'ebé sei ativu iha época ne'ebé Evanjellu ne'e hakerek... Mateus pretende klarifika sasán sira no konvida João nia eskolante sira, ne'ebé sei ativu iha atu adere ba proposta kristán iha Jezús nia Kreda.

MENSAJEN

Ita-nia testu fahe ba parte rua... Iha parte dahuluk, Jezús hatán ba pergunta João nian no halo nia komprende katak Nia mak Mesias (vers. 2-6); iha parte daruak, ita iha apresiasaun ne'ebé Jezús rasik halo kona-ba João nia figura no asaun profétika (vers. 7-11).

Jezús iha konxiénsia kona-ba sai Mesias? Resposta mak loos duni positiva; atu fó resposta Jezús uza Isaías nia sitasaun lubuk ida, iha perspetiva profeta sira-nian, kona-ba Mesias nia asaun sira: fó moris ba mate sira (kf. Is 26,19), kura ema tilun-diuk sira (kf. Is 29,18), halo matan-delek sira haree, fó liberdade movimentu nian ba ain-kude'ik sira (kf. Is 35,5-6), haklaken Liafoun Di'ak ba kiak sira (kf. Is 61,1). Se Jezús realiza obra sira-ne'e (kf. Mt 8-9), tanaba Nia mak Mesias, ne'ebé Maromak haruka atu liberta ema sira no lori “Reinu” ba sira. Ninia mensajen no ninia jestu sira kontein proposta libertadora ne'ebé Maromak halo ba ema sira.

Iha parte daruak, ita iha deklarasaun ida Jezús nian kona-ba Batista. Mateus utiliza rekursu retóriu koñesidu: pergunta lubuk ida ne'ebé konvida ouvinte sira atu fó resposta konkreta ida. Resposta ba kestaun rua dahuluk mak resposta negativa: João la'ós pregadór oportunista ida, iha ne'ebé nia mensajen tuir moda, no la'ós elegante konvensidu ida ne'ebé moris iha luxu. Resposta ba kestaun datuluk mak resposta positiva: João mak profeta ida no liután profeta ida. Deklarasaun, ne'ebé hahú ho referénsia ida ba (kf. Ex 23,20; Mal 3,1) pretende klarifika sá loos relasaun entre sira na'in rua no João nia fatin iha “Reinu”: João mak prekursór Mesias nian; “Elias” mak ida ne'ebé mak tenke mai molok, atu prepara dalan ba Mesias (kf. Mal 3,23-24)... Maski nune'e, sira ne'ebé tama iha “Reinu” liuhusi tatuir Jezús nian, boot liu duké ninia.